



Jecher und Wilderer

Wie die Amerikaner kumme sen, do hebbe alli Läüt ihre Fotoapparate, Fernglescher un selbschtverschändlich alli Waffe un Munizion uff em Rodhausch abgäbbe gmößt. De

Ballewechs-Välde un de Lenze-Heiner des warn domols die Förschter un a die Jecher in Schnäbbärbch. Doch ohne Gwehr und Flinte hebbe die nix mi schieße gekönnt. Es is deshalb net ausgebliebe, daß in korzer Zeit, also sou noch zwä bis drei Jahr die Willsäü in Schnäbbärbch überhandnumme hebbe.

Die Willsäü hebbe die Frucht uff de Äcker verwüschtet un die Kartoffel gfresse, no bevor die überhaupt zeitich warn. Die Schnäbbärbcher Läüt hebbe sich nemmi anners zu helfe gwößt, als am ganze Wallrand en Zou zu zieche. Mein Vater war scho aus de Gfangenschaft hem kumme un do sen mer halt eines Daaches nüber unsern Rauschklinge un hebbe mit fichteni Schtange en ogfähr en Meter houche Zou gezimmert. Korz druff do war domols dann de ganze Wall obberm Heschemuti eigezäünt.

Dobbern Kercheschlaach hot de Ballewechs-Välde e Willsau-Falle gebaut. Er hot mitte im Wall e Schtück von vielleicht sex uff sex Meter eigezäünt. Uff eenere Seite hot er Looch glosse un do obbe drüber e Falltür gezimmert. Die Tür is an eme scharke Sääl ghengt. Des Sääl war über e dicki Querschlange gschpant. Am annere Enn von dem Sääl war e klenners Schtengle drogebunne, des wu im Bode feschtgmaacht war.

In die Falle sen alti Kartoffel un Kaschtanie neikumme. Wenn die Willsäü in die Nöh von der Fall kumme sen un die Kartoffel un Kaschtanie gschmackt hebbe, dann sen die in die Falle nei un hebbe rümgrüßt. Dodebei hebbe se die Schtange im Bode loußgwühlt un die Falltür, die jo recht schwer war, is rabbgfalle. Uff die Art hot de Ballewechs-Välde einiche Willsäü gfange.

Äbber do hots a no de Farrekopfe-Heiner gäbbe. Zu dem hebbe die Läüt schpäter a Hüngeles-Heiner gsagt. Der

soll gwildert hebbe. Wie die Polizei bei dem es Hausch durchsücht hot, do hebbe die ogäbblich en Haufe Felle von Rej un Willsäü gfunne. Die soll de Heiner mit Karabienner, die wu er irchendwo im Wall verschteckelt hot, abgeschosses hebbe.

Außer em Heiner sen äbber a no Annerl naus wildern gange, blous die sen net verwüscht worn. Es hot sogar ghäße, daß Droht-Schlinge gschteilt worn sen. Ganz beschtimmt hebbe die Schnäbbärcher Läüt des blous gmaacht, weil se Hunger ghat hebbe. Unner uns gsagt, ich hab domols a emoll e Forelle mit de Mieschtgabel daus em Sejlwiesche-Währ gfange. Des gäb i blous deswech zu, weil des hoffentlich lengscht verjährt is.

De Farrekopfe-Heiner is übrichens immer adrett un gepflecht in grüne Klamotte, sou wie en echter Jecher rümglaafe. Schpäter wie die Däütsche widder Gwehre griecht hebbe, do hot der Heiner sogar e richtichi Jachd gepachtet. Solche Wandlunge sen ebber nix näüs. Mer brauch blous an de Saulus denke aus dem en Paulus worn is. Warüm soll dann net aus eme Wilderer en gudder Jecher wern?

